

# केशव-ग्रंथावली

खंड १

( रसिकप्रिया और कविप्रिया )

संपादक

श्री विश्वनाथप्रसाद मिश्र

हिंदी-विभाग, काशी विश्वविद्यालय

१९५४

हिंदुस्तानी एकेडेमी

उत्तरप्रदेश, इलाहाबाद

प्रथम संस्करण : १९५४ : २००० प्रतियाँ

मूल्य पाँच रुपये



मुद्रक : राय आनन्द कृष्ण  
शारदा मुद्रण : ठठेरी बाजार, बनारस

( दोहा )

राधा राधारमन के कहे यथामति हाव ।  
ढिठई 'केसवराइ' की छमियो कबि कबिराव ॥२७॥

इति श्रीमन्महाराजकुमारश्रीइंद्रजीतविरचितायां रसिकप्रियायां  
राधिकाकृष्णहावभाववर्णनं नाम षष्ठः प्रभावः ॥२७॥

७

अथ अष्ट नायिका-वर्णन-( दोहा )

ये सब जितनी नायिका, बरनी मति-अनुसार ।  
'केसवदास' बखानियै ते सब आठ प्रकार ॥१॥  
स्वाधीनपतिका, उक्कहाँ, बासकसज्जा नाम ।  
अभिसंधिता बखानियै और खंडिता बाम ॥२॥  
'केसव' प्रोषितप्रेयसी लब्धाविप्र सु आनि ।  
अष्ट नाइका ये सकल अभिसारिका सुजानि ॥३॥

अथ स्वाधीनपतिका-लक्षण-( दोहा )

'केसव' जाके गुन-बँध्यो सदा रहै पति संग ।  
स्वाधीनपतिका तासु कौं, बरनत प्रेम-प्रसंग ॥४॥

प्रच्छन्न स्वाधीनपतिका, यथा-( सवैया )

'केसव' जीवन जो ब्रज को पुनि जीवहु ते अति बापहि भावै ।  
जापर देव-अदेव-कुमारिनि वारत / माइन बार लंगावै ।  
ता हरि पै तू गँवार की बेटी महावर पाइ भवँड दिवावै ।  
हौं तौ बची अब हाँसिनि हू, ऐसैं और जौ देखै तौ ऊतर आवै ॥५॥

प्रकाश स्वाधीनपतिका, यथा-( कवित )

चोली को सो पान तोहि करत सँवारिबोई,  
मुकुर ज्यों तोहीं बीच मूरति समानी है ।  
तोहीं तियदेवता पै पायो पति 'केसोदास',  
पतिनी बहुत पतिदेवता बखानी है ।  
तेरे मनोरथ भागीरथ-रथ / पाछै पाछै,  
डोलत गुपाल मेरो गंगा को सो पानी है ।

ऐसी बात कौन जु न मानी, सुनि, मेरी रानी,  
उनकेँ तौ तेरी बानी बेद की सी बानी है ॥६॥

अथ उत्का-लक्षण-( दोहा )

कौनहुँ हेत न आइयो, प्रीतम जाके धाम ।  
ताकेँ सोचति सोच हिय 'केसव' उत्का बाम ॥७॥

प्रच्छन्न उत्का, यथा-( कवित )

किधौँ गृह-काज कै न छूटत सखा-समाज,  
किधौँ कल्ल आज व्रत-बासर बिभात तैं ।  
दीनो तैं न सोधु, किधौँ काहू सों भयो बिरोधु,  
उपज्यो प्रबोधु किधौँ उर अवदात तैं ।  
सुख में न देहु किधौँ मोही सों कपट-नेहु  
किधौँ देखि मेहु अति डरे अधिरात तैं ।  
किधौँ मेरी प्रीति की प्रतीति लेत 'केसोदास'  
अजहूँ न आए मन सु धौँ कौन बात तैं ॥८॥

प्रकाश उत्का, यथा-( सवैया )

सुधि भूलि गई, भुलए किधौँ काहू कि भूलेई डोलत बाट न पाई ।  
भीत भए किधौँ 'केसव' काहू सों, भेंट भई कोऊ भामिनि भाई ।  
मग आवत है किधौँ आइ गए, किधौँ आवहिँ गे, सजनी सुखदाई ।  
अब आए न नंदकुमार बिचारि, सु कौन बिचार अबार लगाई ॥९॥

अथ बासकसज्जा-लक्षण-( दोहा )

बासकसज्जा होइ सो, कहि 'केसव' सबिलास ।  
चित्तवै रति गृह-द्वार त्यौँ पिय-आवनि की आस ॥१०॥

बासकसज्जा, यथा-( कवित )

चंदन बिटप / बपु कोमल अमल दल,  
ललित वलित लता लपटी, लवंग की ।  
'केसोदास' तामें दुरी दीप की सिखा सी दौरि,  
दुरवति नील बास दुति अंग अंग की ।  
पौन पानी पंछी पसु बस सद जित जित  
होइ तित तित चौँकि चाहै चोप संग की ।  
नंदलाल-आगम बिलोके कुंजजाल बाल,  
लीनी गति तेहीं काल पंजर-पतंग की ॥११॥

प्रकाश वासकसज्जा, यथा—( सवैया )

भाषति है सुख-बैन, सखी, सहुलास हियें / अभिलाषनि जो है ।  
कोमल हासनि नैन बिलासनि अंग-सुवासनि कै मन मोहै ।  
मूरतिवंति किधौं तुलसी / तुलसी-वन में, रति-मूरति को है ।  
कुंज बिराजति गोपबधू कमला जनु कुंज-कुटी महिं सोहै ॥१२॥

अथ अभिसंधिता-लक्षण—( दोहा )

मान मनावत हूँ करै, मानद को अपमान ।  
दूनो दुख तिन बिनु लहै अभिसंधिता बखान ॥१३॥

प्रच्छन्न अभिसंधिता, यथा—( कवित )

बार बार बोले जब बोल्यो न बालिस तब,  
बालक ज्यों बोलिबे कौं कत बिललातु है ।  
ज्यों ज्यों परे पाइनि त्यों पाहन तें पीन भयो,  
होतु कहा अब किये माखन सो गातु है ।  
'केसोदास' सब छाड़ि कियो हठ/ही सौं हेत,  
बाहु छाड़ि जिय/जिये बिनु कहा जातु है ।  
ऐसे प्यारे पीय ही सौं मान्यो न मनायो तब,  
ऐसी तोहिं बूझियै जु पाछें पछितातु है ॥१४॥

प्रकाश अभिसंधिता, यथा—( सवैया )

पाइ परँ हूँ तें प्रीतम त्यों कहि 'केसव' क्योँ हूँ न मैं दग दीनी ।  
तेरी सखी, सिख सीखी न एक हूँ/रोष ही की सिख सीखि जु लीनी ।  
चंदन चंद समीर सरोज जरै दुख देह भई सुख हीनी ।  
में उलटी जु करी बिधि मोँ कहँ न्यायनि हौँ उलटी बिधि कीनी ॥१५॥

अथ खंडिता-लक्षण—( दोहा )

आवन कहि आवै नहीं आवै प्रीतम प्रात ।  
जाके घर सो खंडिता कहै जु बहु बिधि बात ॥१६॥

प्रच्छन्न खंडिता, यथा—( कवित )

आँखनि जौ सुफत न/काननि तौ सुनियत,  
'केसोदास' जैसे तुम लोकनि में गाए हो ।  
बंस की बिसारी सुधि काक ज्यों चुनत फिरौ,  
जूठे सीठे सीथ सठ-ईठ, ढीठ ठाए हो ।  
दूरि दूरि करत हूँ दौरि दौरि गहौ पाइ,  
जानौं न कुठौर ठौर जानि जिय पाए हो ।

काको घर घालिवे कौं बसे कहाँ घनस्याम,  
 घूघू ज्यों घुसन प्रात मेरे गृह आए हौ ॥१७॥  
 प्रकाश खंडिता, यथा—( सवैया )

आजु कछु अँखियाँ हरि, और सी मानों महावर माहँ रंगी हँ ।  
 मोहन मोही सी लागति मोहिँ इतें पर मोहन मोह लगी हँ ।  
 मेरी सो मोसहुँ मानहुँ बैगि हियें रस-रोष की रीति जगी हँ ।  
 मेरे बियोग के तेज तर्चीं किधौं 'केसव' काहू के प्रेम पगी हँ ॥१८॥

अथ प्रोषितपतिका-लक्षण—( दोहा )

जाकों प्रीतम है अवधि, गयो कौन हूँ काज ।  
 ताकों प्रोषितप्रेयसी कहि कुरनत कबिराज ॥१९॥

प्रछन्न प्रोषितपतिका, यथा—( सवैया )

'केसव' कैसेहूँ पूरवपुन्य मिल्यो मनभावतो भाग भखो री ।  
 जानै को माई कहा भयो क्योहूँ जु औधि को आधिक दोस टखो री ।  
 ताकहूँ तू न अजौँ हँसि बोलै जऊ मेरो मोहन पाइ पखो री ।  
 काठहूँ तैं हठ तेरो कठोर इतें बिरहानल हू न जखो री ॥२०॥

प्रकाश प्रोषितपतिका, यथा—( सवैया )

औधि है आए उहाँ उनसों, यह भोजन कै अबहीं हम ऐहँ ।  
 ताकहँ हौ अब लौं बहराइ कै राखी बखाइ मरु करि मै हँ ।  
 बैठे कहा इनके ढिग 'केसव' जाहु नहीं कोउ आइ जु कै हँ ।  
 जानत हौ उनि आँखनि तैं असुवा उमगे बहुखौ पुनि रै हँ ॥२१॥

अथ विप्रलब्धा-लक्षण—( दोहा )

दूती सों संकेत कहि लैन पठाई आप ।  
 लब्धाविप्र सो जानियै अनआए संताप ॥२२॥

प्रछन्न विप्रलब्धा, यथा—( सवैया )

सूल से फूल सुवास कुवास सी भाकसी से भए भौन सभागे ।  
 'केसव' बाग महावन सो जुड़ सी चढ़ी जोन्ह सबै अँग दागे ।  
 नेह लग्यो उर नाहर सो निशि नाह घरीक कहूँ अनुरागे ।  
 गारी से गीत विरी बिष सी सिगरेई सिंगार अँगार से लागे ॥२३॥

प्रकाश विप्रलब्धा, यथा—( कवित्त )

देखत उदधिजात देखि देखि निज गात,  
 चंपक के पात कछु लिख्यो है बनाइ कै ।  
 सकल सुगंध ढारि फूल-माल तोरि ढारि,  
 दूतिका कौं मारि पुनि बीरी बगराइ कै ।

लै लै दीह साँस / तजि बिबिध बिलास हास,  
 'केसोदास' है उदास चली अकुलाह कै ।  
 सेइ कै संकेत सुनो, कान्हजू सौं बोलि ऊनो,  
 मोसौं कर जोरि दूनो दूनो दुख पाइ कै ॥२४॥

अथ अभिसारिका-लक्षण-( दोहा )

हित तें, कै मद-मदन तें, पिय पै मिलै जु जाइ ।  
 सो कह्यै अभिसारिका धरनी त्रिविध घनाइ ॥२५॥

अथ स्वकीया अभिसारिका-लक्षण-( दोहा )

अति सलज्ज पग मग धरै चलत बधुन के संग ।  
 स्वकिया को अभिसार यह भूषन-भूषित अंग ॥२६॥

परकीया अभिसारिका, यथा-( दोहा ) ?

जनी सहेली सोभहीं बधु-बधू-संग चार ।  
 मग में देइ बराइ डग, लज्जा को अभिसार ॥२७॥

प्रच्छन्न प्रेमाभिसारिका, यथा-( कवित्त )

लीनो हम मोल, अनबोलें आई, जान्यो मोह,  
 मोहिं, घनस्यामं, घनमाला बोलि लाई है ।  
 देख्यो हँहै दुख जहाँ, देह हू न देखी परै,  
 देखी कैसें, बाट 'केसो' दामिनी दिखाई है ।  
 ऊँचे नीचे बीच-कीच कंटकनि परे पग  
 साहस-गयंद-गति अति सुखदाई है ।  
 भागी भयकारी निसि / निपट अकेली तुम,  
 नाहीं, प्राननाथ, साथ प्रेमजू सहाई है ॥२८॥

प्रकाश प्रेमाभिसारिका, यथा-( कवित्त )

नैननि की अतुराई बैननि की चतुराई,  
 गात की गुराई न दुरति दुति चाल की ।  
 आपने चरित्रनि के चित्रत बिचित्र चित्र,  
 चित्रनी ज्यौं, सोहै साथ पुत्रिका गुवाल की ।  
 चंद्र के समान चारु चाय सौं चढ़ाएँ फिरै,  
 करिकै तिहारे मृग-नैननि की पालकी ।

[ २६ ] पग०-डगमग भरी (बाल०) । संख्या २६-२७ 'रस०' में नहीं है । ✓

[ २८ ] परे-पीढ़े (नवल०) । [ २६ ] साथ-संग (रस०) ।

कीजै पय-पान अरु खैयै पान, प्रानप्यारे  
आई है जू आई अलबेली ग्वालि कालि की ॥२६॥

प्रच्छन्न गर्वाभिसारिका, यथा—(सवैया)

लाड़िली लीली कलोरी लुरी कहँ, लाल, लुके कहँ, अंग लगाइ कै ।  
आजु तौ 'केसव' कैसहुँ लेखवै लागन देति न देखहु आइ कै ।  
बेगि चलौ उठि आई लिवानन दौरि अकेलियै हौँ अकुलाइ कै ।  
भूबिहुँ गोकुल गाँठ में, गोबिंद, कीजै गरुर न/गाइ चराइ कै ॥३०॥

प्रकाश गर्वाभिसारिका, यथा—(कवित)

चंदन चढ़ाइ / चारु अंबर के / उर<sup>३</sup> हारु,  
सुमन-सिंगार—सोहै आनंद के कंद ज्यों ।  
वारौ कोरि रतिनाथ, बीन में बजावै गाय,  
सृगज मराल साथ, बानी जगबंद ज्यों ।  
चौंकि चौंकि चकई सी/सौतिन की दूती चलीं  
सौते भई दीनी अरबिंद/दुति मंद ज्यों ।  
तिमिर-बियोग भूले, लोचन चकोर फूले  
आई ब्रजचंद चलि चंदावलि चंद ज्यों ॥३१॥

प्रच्छन्न कामाभिसारिका, यथा—(कवित)

उरभक्त उरग, चपत चरननि फन,  
देखत बिबिध निसिचर दिसि चारि के ।  
गनति न लागत सुसल-धार, सुनत न  
मिल्लीगन-घोष, निरघोष जलधारि के ।  
जानति न भूषन गिरत, पट फाटत न  
कंदक अटकि उर उरज उजारि के ।  
प्रेतनि की पूछि नारि कौन पै तैं सीख्यो यह  
जोग कैसो सारु अभिसारु, अभिसारिके ॥३२॥

प्रकाश कामाभिसारिका, यथा—(सवैया)

गोप बड़े बड़े बैठे अथाइन 'केसव', कोटि सभा अवगाहौं ।  
खेलत बालक-जाल गलीन में बाल बिलोकि बिलोकि बिकाहौं ।  
आवति जाति लुगाई चहुँ दिसि घूँघट में पहिचानति छाहौं ।  
चंद सो आननु काढ़ि कहा चली सुभक्तु है कछु तोहिं की नाहौं ॥३३॥

[ २६ ] चढ़ाएँ फिरै—चढ़ी फिरति (बाल०, नवल०) ।

[ ३० ] उठि—चलि (नवल०) । लिवानन—बुलावन (नवल०) ।



( दोहा )

'केसवदास' सु तीन बिधि, बरनी स्वकिया नारि ।  
परकीया द्वै भाँति पुनि आठ आठ अनुहारि ॥३४॥  
उत्तम मध्यम अधम अरु तीन तीन बिधि जान  
प्रकट तीन सै साठ तिय 'केसवदास' बखान ॥३५॥

अथ उत्तमा-लक्षण-( दोहा )

मान करै अपमान तैं तजै मान तैं मान ।  
पिय देखैं सुख पावई ताहि उत्तमा जान ॥३६॥

उत्तमा, यथा-( सवैया )

होइ कहा अब के समुझे न तवै समुझे जब हे समुझाए ।  
एक ही बंक बिलोकनि माहँ अनेक अमोल बिबेक बिकाए ।  
जानिपनो न जनावहु जी जनमावधि लौँ उहि जानि हौँ पाए ।  
बात बनाइ बनाइ कहा कहौ लेहु मनाइ मनाइ ज्यों आए ॥३७॥

अथ मध्यमा-लक्षण-( दोहा )

मान करै लघु दोष तैं छोड़ै बहुत प्रनाम ।  
'केसवदास' बखानियै ताहि मध्यमा बाम ॥३८॥

मध्यमा, यथा-( सवैया )

मूलेहँ सुखेँ नहीं चितयो इहिँ, कान्ह कियो लचि लालच केतौ ।  
हाहा कै हारि रहे मनमोहन पाइ परे त्यों परेई रहे तौ ।  
हौँ तौ यहै तब ही की बिचारति होतौ गुमान क्यों याहि धौँ एतौ ।  
लाँबी लटैँ अरु पातरी देह जु नैक बड़ी बिधि आँखि न देतौ ॥३९॥

अथ अधमा-लक्षण-( दोहा )

रूठै बारहिँ बार जो तूठै बेहीं काज ।  
ताही सौँ अधमा सबै कहि बरनत कबिराज ॥४०॥

अधमा, यथा-( सवैया )

काटौँ कपटु जो कान्ह सौँ कीजै री/ बाँटौँ वे बोल कुबोल कसाई ।  
फारौँ सु घूँघट ओट अटै/ सोई दीठि फोरौँ अध कौँ जु धसाई ।  
'केसव' ऐसी सखीन कौँ मारौँ सिखै कै करेँ हित की जु हँसाई ।  
बारहि बार को रूसबो बारौँ-बहाऊँ सु बुद्धि-बियोग-बसाई ॥४१॥

( दोहा )

इहि विधि नायक-नायिका बरनहुँ सहित विवेक ।  
जाति काल बय भाव तँ 'केसव' जानि अनेक ॥४२॥

अथ अगम्या नायिका ( दोहा )

तजि तरुनी संबध<sup>①</sup> की, जानि मित्र, द्विजराज ।  
राखि लेइ दुख भूख तँ ताकी तिय तँ भाज ॥४३॥  
अधिक बरन अह अंग घटि, अंत्यज जन की नारि ।  
तजि विधवा अरु पूजिता रमियहु रसिक बिचारि ॥४४॥  
यह संजोग सिंगार की 'केसव' बरनी रीति ।  
बिप्रलंभ सिंगार की रीति कहौ करि प्रीति ॥४५॥

इति श्रीमन्महाराजकुमारइंद्रजीतविरचितायां रसिकप्रियायामष्ट  
नायिकासंभोगशृंगारवर्णनं नाम सप्तमः प्रभावः ॥ ७ ॥

८

अथ विप्रलंभ शृंगार-लक्षण-( दोहा )

बिहुरत/ प्रीतम प्रीतमा होत जु रस तिहि ठौर ।  
बिप्रलंभ सिंगार कहि बरनत कवि-सिरमौर ॥१॥

अथ विप्रलंभ शृंगार-भेद-वर्णन-( दोहा )

बिप्रलंभ सिंगार को चारि प्रकार प्रकास ।  
प्रथम पूर्व-अनुराग पुनि करुना, मान, प्रवास ॥२॥

अथ पूर्वानुराग-लक्षण-( दोहा )

देखतहीं दुति दंपतिहिँ उपजि, परत अनुराग ।  
बिन देखेँ दुख देखियै सो पूरब-अनुराग ॥३॥

श्रीराधिकाजू को प्रच्छन्न पूर्वानुराग, यथा-( कवित )

फूल न दिखाव सूल फूलत है हरि बिनु  
दूरि करि माल बाल-ब्याल सी लगति है ।  
चँवर चलाव जिन, बीजन हलाव मति  
'केसव' सुगंध बाय बाय-सी लगति है ।